

Embargo: Hanya boleh diterbitkan atau disebarikan mulai jam 1200, Jumaat, 19 Januari 2024



KEMENTERIAN EKONOMI
JABATAN PERANGKAAAN MALAYSIA

KENYATAAN MEDIA

PERANGKAAAN PERDAGANGAN LUAR NEGERI MALAYSIA

Disember 2023

Jumlah dagangan Malaysia pada Disember 2023 menurun 4.3 peratus kepada RM225.1 bilion

PUTRAJAYA, 19 Januari 2024 – Jumlah dagangan Malaysia terus mengalami penurunan pada Disember 2023, merekodkan kemerosotan untuk bulan ke-10 berturut-turut sejak Mac 2023, didorong oleh permintaan global yang lemah dan harga komoditi yang rendah. Jumlah dagangan turun 4.3 peratus kepada RM225.1 bilion didorong oleh eksport yang lebih rendah, jatuh 10.0 peratus kepada RM118.5 bilion, tahun ke tahun. Sebaliknya, import menunjukkan peningkatan, mencatatkan peningkatan 2.9 peratus kepada RM106.7 bilion. Sementara itu, imbalan dagangan kekal dalam lebihan dengan nilai RM11.8 bilion, menyusut 57.8 peratus pada Disember 2023. Bagi prestasi keseluruhan 2023, jumlah dagangan merosot 7.3 peratus seiring dengan prestasi eksport (-8.0%) dan import (-6.4%). Prestasi perdagangan barangan yang menggalakkan pada 2022 mempengaruhi pertumbuhan tahunan pada tahun ini seperti yang dilaporkan hari ini dalam **BULETIN PERANGKAAAN PERDAGANGAN LUAR MALAYSIA, Disember 2023**. Buletin ini juga membentangkan prestasi produk untuk eksport dan import serta rakan dagangannya.

Ketua Perangkawan Malaysia, Dato' Sri Dr. Mohd Uzir Mahidin berkata, "Prestasi eksport Malaysia mencatatkan penguncupan pada Disember 2023 selaras dengan penurunan yang ditunjukkan oleh kedua-dua eksport semula dan eksport domestik. Eksport semula berjumlah RM21.2 bilion, menyusut 20.3 peratus berbanding Disember 2022. Eksport domestik bernilai RM97.3 bilion, menyumbang 82.1 peratus kepada jumlah eksport, berkurang 7.4 peratus. Import pada Disember 2023 bernilai RM106.7 bilion, naik 2.9 peratus berbanding bulan yang sama tahun lepas. Sementara itu, lebihan dagangan menguncup 57.8 peratus kepada RM11.8 bilion, lebihan dagangan ke-44 bulan berturut-turut sejak Mei 2020. Berbanding November 2023, prestasi eksport, import, jumlah dagangan dan imbalan dagangan merekodkan penurunan masing-masing 2.7 peratus,

2.6 peratus, 2.6 peratus dan 3.6 peratus.”

Meninjau dari sudut kumpulan barangan, 132 daripada 257 kumpulan eksport menunjukkan penurunan, manakala 132 daripada 259 kumpulan import meningkat berbanding bulan yang sama tahun sebelumnya.

Ketua Perangkawan Malaysia menjelaskan bahawa eksport yang lebih rendah disumbangkan oleh penurunan terutamanya ke Singapura (-RM5.2 bilion) diikuti Kesatuan Eropah (-RM3.1 bilion), India (-RM1.0 bilion), Republik Korea (-RM815.4 juta), Amerika Syarikat (-RM792.7 juta), Hong Kong (-RM731.8 juta) dan Thailand (-RM565.3 juta). Sementara itu, import yang lebih tinggi disumbangkan terutamanya dari Amerika Syarikat (+RM1.5 bilion), diikuti oleh Singapura (+RM1.3 bilion), Republik Korea (+RM732.2 juta), Sudan (+RM592.9 juta), Arab Saudi (+RM530.2 juta) dan Rusia (+RM436.6 juta).

Mengulas lebih lanjut, penyusutan eksport selaras dengan pengurangan oleh barangan elektrik & elektronik (-RM6.3 bilion); minyak kelapa sawit & keluaran pertanian berasaskan minyak kelapa sawit (-RM2.8 bilion) dan keluaran petroleum (-RM2.6 bilion). Sementara itu, peningkatan import dicatatkan bagi petroleum mentah (+RM2.3 bilion); barangan elektrik & elektronik (+RM1.9 bilion) dan pertanian lain (+RM640.7 juta).

Selanjutnya, Dato' Sri Dr. Mohd Uzir Mahidin berkata, “Peningkatan import mengikut Penggunaan Akhir seiring dengan permintaan yang lebih tinggi bagi barangan modal dan barangan perantaraan. Import barangan modal bernilai RM12.4 bilion, meningkat 24.6 peratus berbanding Disember 2022, mewakili 11.6 peratus daripada jumlah import. Barang perantaraan (56.2% daripada jumlah import), meningkat 10.1 peratus daripada RM54.5 bilion pada tahun sebelumnya kepada RM60.0 bilion. Barang penggunaan (8.6% daripada jumlah import), bernilai RM9.2 bilion, mencatatkan penurunan 0.7 peratus atau RM60.3 juta.”

Prestasi bagi suku tahun keempat (ST4) 2023, jumlah dagangan dan eksport mengalami penurunan berbanding tempoh yang sama tahun lalu. Jumlah dagangan jatuh 3.2 peratus, sejajar dengan pengurangan eksport (-6.9%). Manakala, import meningkat 1.3 peratus. Lebihan dagangan berjumlah RM36.9 bilion, berkurang 45.9 peratus berbanding tempoh yang sama pada tahun 2022.

Jumlah dagangan, eksport, import dan lebihan dagangan bagi keseluruhan tahun 2023 turut mencatatkan penurunan. Jumlah dagangan turun 7.3 peratus, daripada RM2.8 trilion kepada RM2.6 trilion, sejajar dengan penurunan eksport (-8.0%) dan import (-6.4%). Pada masa yang sama, lebihan dagangan merosot 16.4 peratus kepada RM214.1 bilion.

Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


DOSM akan menjalankan Banci Pertanian pada tahun 2024. Mohon layari

<https://www.myagricensus.gov.my/> untuk maklumat lanjut. Tema adalah “Banci Pertanian, Kunci Kemajuan Pertanian.”


Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”.

Pangkalan Data Utama (PADU) telah diluncurkan pada 2 Januari 2024. PADU mengandungi profil individu dan isi rumah meliputi warganegara dan pemastautin tetap di Malaysia. Matlamat utama PADU untuk memastikan rakyat Malaysia tidak tercicir daripada setiap inisiatif berpaksikan rakyat yang dilaksanakan oleh Kerajaan. Dimohon kerjasama untuk mendaftar dan mengemaskini PADU sebelum atau pada 31 Mac 2024. Untuk maklumat lanjut, boleh layari www.padu.gov.my. Sebarang pertanyaan sila hubungi talian hotline 1-800-88-7721 atau log masuk secara online melalui SISPA: <https://padu.spab.gov.my>.


Carta 1: Perangkaan Perdagangan Luar Negeri, Jan 2022 – Dis 2023
(Nilai dan Peratus Perubahan Tahunan)




Carta 2: Perangkaan Perdagangan Luar Negeri, 2018 – 2023



Carta 3: Import mengikut Klasifikasi Penggunaan Akhir & Kategori Ekonomi Umum (BEC),
Jan 2022 – Dis 2023
(Nilai dan Peratus Perubahan Tahunan)



Carta 4: Import mengikut Klasifikasi Penggunaan Akhir & Kategori Ekonomi Umum (BEC),
2018 – 2023



Dikeluarkan oleh:

PEJABAT KETUA PERANGKAWAN

JABATAN PERANGKAAN MALAYSIA

19 JANUARI 2024